

EM2017/123
9. November 2017
Michael Rosing, Attaviitsoq

Naalakkersuinikkut sulinermut aningasatigut tapiissuteqartarneq pillugu Inatsisartut inatsisaat.

(Inatsisartut Siulittaasoqarfiat)

Demokratimut pingaaruteqarpoq kikkut tamarmik peqataasinnaanissaat. Tamanna Kalaallit Nunaanni isorartoorsuarmi ajornakusoortuuvoq. Tamatuma kinguneranik Nuup avataani najugaqartut ukiup ingerlanerani arlaleriarlutik uteqattaartariaqartarput. Ajoraluartumilli aamma naapertuutinngitsumik ataatsimeeriaaseqarpugut, qaammatialunnguani sulerulunnartartumik. Angerlarsimaffimmillu ungasissumiittariaqartarneq sassarusuttunut nalornilersitsisarpoq. Demokrati eqqarsaatigalugu tamanna pitsavallaanngilaq.

Matumani siunnersuummi tamanna aaqqeriallatsiarneqarpoq pilerinarsarlugu sassarnissaq qitoraqaraanni. Aningasartuutaqarporli allanut atorluarneqarsinnaagaluartunik. Aamma tamatuma malunnarsitippaa allaanngitsoq Inatsisartuni ilaasortat landskarsip aningasaataanik killeqanngitsumik imminnut atuerusuttut. Taamaakkaluarpormi ilaannikkulli nassuerutigisariaqarpoq akeqartoq kikkut tamaasa peqataatissagaanni.

Siunnersuutip immikkoortuata aappaani pineqarput soraarnerussutisiassat soraarnerussutisiaqarnermut malittarisassat allanngornerat pissutigalugu, tamannalu eqqartornerusariaqarluarpoq. Allannguutissalli tusaatissatut tiguinnassavakka.

Taamatut oqaaseqarlunga siunnersuutip aappassaaneerneqannginnerani Inatsisartut suleriaasiat pillugu ataatsimiitaliami suliarisassanngorlugu innersuuppara.